

Date – 18/02/2025

Time - 18:30 -18:40Hrs

REGIONAL NEWS BULLETIN

HEADLINES (EVENING)

- NITI Aayog Aspirational District Program ah Mizorama Mamit District chu Financial Inclusion leh Skill Development huanga ti tha bera thlan a ni.
- Naktuk chawhma dar 10 ah Mizoram Legislative Assembly budget session tan a ni ang.
- Prime Minister Narendra Modia leh Amir of Qatar, Sheikh Tamim Bin Hamad Al-Thani te chu vawiin khan New Delhiah an inkawm.
- Ukraine-a indona tihtawp tumin vawiin atang khan US leh Russia ram hruaitute Saudi Arabia khawpui Riyadh ah an indawr tan.



NITI AAYOG ADP RANKING

Ramchhunga District hnufual chawikanna tura duan NITI Aayog Aspirational District Program ah Mizorama Mamit District chu Financial Inclusion leh Skill Development huanga ti tha bera thlan a ni.

National Institution for Transforming India (NITI Aayog) hian nimin piah khan Aspirational District Program hnuaia ramchhunga District ti tha 36 an tarlang a, Mizoram atangin Mamit District chu Mitin huap sum leh pai lama hmasawanna – Financial Inclusion leh Eizawng tura thiamna – Skill Development lama hmasawanna kawngah ti tha ber a ni a, hemi lawmman atan hian cheng vbch 3 a keng tel dawn a ni.

NITI Aayog in ramchhunga state 16-a District ti tha a puan zingah hian hmarchhak atangin Mizoram chu a lang awmchun a ni a, Aspirational District Program hnuaiah hian intihsiakna hrang hrang awmin hriselna dinhmun, lo neia eizawnna, mipui hmasawnna leh zirlan lama hmasawnna bakah Mamit District in lawmman a dawnna mitin huap sum leh pai lama hmasawnna leh eizawng tura thiamna te a tel a, heng bakah hian intihsiakna hrang hrang a awm bawk.

<><><>

ASSEMBLY

Naktuk atanga tan tur Mizoram Legislative Assembly inkhawm (budget session) atan sorkar dan siam tura duan thar pathum a lut tawh a, heng zingah hian Higher & Technical Education Department atanga thehluh Mizoram state University Bill a tel.

Assembly Secretariat atanga thudawn danin Mizoram state University Bill bakah hian sawrkar dan siam tura duan thar LESDE atangin The Mizoram Private Placement Agencies (Regulation) Bill, 2025 leh UD&PA atangin The Mizoram Urban & Regional Development Bill, 2025 te thehluh a ni tawh a, He'ng bill pathum bakah hian Finance department atangin dan siamthat tur The Mizoram Goods & Service Tax (First Amendment) Bill, 2025 chu thehluh a ni tawh bawk.

Official Resolution pakhat lut tawhin, heihi environment, forests & climate change minister Pu Lalthansanga'n assembly pawmpui tura a putluh tur a nih thu dawn a ni a. Hei hi Parliament-in dan a lo pawm tawh “The Water (Prevention & Control of Pollution) Act” Mizoram assembly in a lo pawmpui (ratify) vena tur ni a thu dawn a ni. Mimal thehluh (private resolution) 85 a lut tawh a. Zirtawpni hi Private member-te puala hun hman thin a nih lai-in tun assembly session-ah hian Zirtawpni vawi khat February ni 21 bak chu Zirtawpni apiang chawlh a nih dawn avangin hun a awm dawn lova. February ni 21-ah pawh hian Prime Minister hlui Dr. Manmohan Singh sunna hun bakah larsap thusawi lawmthu sawina motion sawiho ni tur a nih dawn avangin hun a tlem hle dawn a ni.

Zawhna hi House chhunga chhan chi (starred question) 817 leh ziaka chhan chi (unstarred question) 96 a lut tawh a. House dawhkana dah tur lehkhaw pawimawh 5 a lut tawh bawk.

Mizoram assembly inkhawmah hian March ni 4 khian finance changtu chief minister Pu Lalduhoma chuan tangka kum thar (2025-2026) atana Mizoram sum hman tur ruahman (annual budget) chu a pharh ang a. Hei hi budget a vawi 2 pharhna tur a ni a, tun tangka kum kallai hi sum harsatna avangin insawhngheh kum (year of consolidation)-ah ZPM sorkar chuan a puang a. Hmalakna lian tham kalpui an tum lo sa a. Kumin budget-ah hian ZPM-in inthlan hma a an lo intiam angte tihpuitlin theihna tur budget danglam hmuh beisei a ni.

<><><>

CHAPCHAR KUT

Art & Culture Minister Pu C. Lalsawivunga'n kumin Chapchar Kut hmang turin zo hnahtlak hmun hrang hranga awm a sawm a, Chapchar Kut chu Aizawl bakah District zawng zawng leh rampawna Mizoram house ah hman a ni dawn tih a sawi.

Pu C. Lalsawivunga chuan Art & Culture Department bultumin Chapchar Kut chu hmun hrang hrangah pui thei ang berin hman a ni dawn a ti a, Chapchar Kut thupui Hawihhawmna chu Mizo hnam ziarang ropui tak, khawtlang nun leh inlaichinna ah bet tlat a ni a, he kut hmang hian he ze ropui tak hi chawi sana a awm theih nan mi zawng zawng tel turin a sawm a ni.

January ni 16-a Chief Minister Pu Lalduhoma kaihhruaia Chapchar Kut organising committee thukhawm chuan kumin Chapchar Kut thupui atan "Zo nun ze mawi - Hawihhawmna" tih chu an thlang a, Chapchar Kut hmanna pui ber chu Aizawl lammualah March ni 6 leh ni 7 ah neih tura duan a ni.

March ni 3 ah hian Chapchar Kut pual Tlan (Kut Run) buatsaih a ni dawn a, ni 4 ah Flower Show leh Painting & Exhibition Show kalpui tan tura ruahman niin March ni 5 ah Chapchar Kut heritage tour buat a ni ang a, he mi ni vek hian Falkawn Zokhuaah Mizo Pi leh pute Nun tarlanna hun buatsaih tan a ni dawn a. A tuk ni 6-ah pawh neih chhunzawm tur niin Ni 5 ah vek hian Kut pual Handloom, Textile & Handicraft Exhibition and Food Processing & Food Court hawn a ni ang a, exhibition & food court hian ni 7 thleng a awh dawn a ni.

<><><>

MAMIT DIST

Mamit Dist Zawlnuam ah vawiin khan Pradhan Mantri Matsya Kisan Samridhi Sah-Yojana (PM-MKSSY) hnuaiah Application Mobilization Camp neih a ni a, he camp-ah hian sangha kaihnawih eizawng mi 180 an tel thei a, NFDP Portal-ah registration tihsak nghal an ni.

Fisheries Department leh National Fisheries Development Board te, Common Service Centres te tang ho buatsaih he hun hi District Fisheries Development Officer Pu Lalramzawngchhuaha Khawlhing chuan a kaihrui a, Pu Vanlalzama, Asst. Fisheries Officer-in kalkhawmte hriattur pawimawhte chahin, Pi Rosalind Vansangkimi, District Programme Manager-in PM-MKSSY chungchang leh registration tih pawimawhna te, scheme hnuaia hamthatna dawn theih hrang hrang a hrilhfiah a ni.

<><><>

AH & VETY

AH & Veterinary Minister Pu C. Lalsawivunga chuan Selesih A.H & Vety Farm ah Durtlang leh Sihphir a bawng vulhtu 41 hnenah a thlawn in bawngchaw tur buhpawl a sem.

Vawiin ran chaw semna pual inkhawm, Selesih AH & Vety Rest House ah neih ah Minister Pu C. Lalsawivunga chuan thu sawiin, bawnghnute, artui leh sa a intodelh tur chuan ran chaw atanga bul tan a ngai a ni, a ti a. A chaw a intodelh hmasak loh chuan a intodelh tak tak theih loh tur thu a sawi a. Hemi kawnga hmalakna neih mekah department lama thawktu ten kuthnathawktute tan thahnemngai taka inpekna tak tak nen an thawhna chu lawmawm a ti a. Minister chuan bawng vulhtute thawhrimzia chu fakawm tiin, kuthnathawktute'n khawsak dinhmun tha zawka hlankai chu sawrkarin a ngaihpawimawh thu a sawi a. State sum indaihlohna karah a theih chin china hmalak pui zel an nih thu thu a sawi.

Minister chuan department thawktu leh farmer kalkhawmte chu ram inngahna leh hnam zahawma kan insiam theihna tura mawhphurhna kengtu an nih thu a sawi a. Kuthnathawktute thawhchhuah chu ram economy chawisan na niin, an ni tello in sawrkar a kal theilo a ni a ti a. Chhel takin taima taka thawk turin a fuih a ni.

Thenzawl Vety Farm a ran chaw chinna hmun acre 57 a zau chu Minister Pu C. Lalsawivunga hovin kum 2023-24 chhung khan acre 70 a zauhvin, a vaiin acre 127 a huam ta a. Selesih Hay House atangin fodder tharchhuah te hi a thlawn in semchhuah a ni. Thenzawl bakah AH & Very Department chuan Selesih, Thingdawl, Lungpuizawl, Mampui leh Siaha ahte ran chaw a ching a. Heng hmun ami te erawh hralh chhuah emaw thawn chhuah tham ni lovin a hmuna ran vulhte tana hman mai a ni. Ran chaw sem chhuah bak hi man tlawm thei ang bera hralh chhuah tum a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

NEP

New Education Policy 2020 thil tum tihhlawhtlin nan School Education Department hmalakna in SCERT chuan Pawl 3 leh Pawl 6 zirlaite tan Random Examination a buatsaih dawn a, Ni 21 zirtawpni khian Random Exam nei tura thlanchhuah district hrang hranga Primary School 222 leh Middle School 112 ten an hmachhawn dawn a ni.

Heng school thlan chhuah Headmaster -te tan hian vawiin khan exam kalpui dan tur inzirtirna hun SCERT-ah hman a ni. Random Examination hi Mizoram tan zirna kawnga rahbi thar niin, zirlaite hi common question chhan tir an ni dawn a. Mizorama zirlaiten an zirlai atanga thiam chhuah tura duante takin an thiam em tih enna turin Competency Based Questions an chhang dawn a ni. Zawhna te hi OMR Sheet veka chhan tura duan a ni.

<><><>

PRIME MINISTER & AMIR OF QATAR

Prime Minister Narendra Modia leh Amir of Qatar, Sheikh Tamim Bin Hamad Al-Thani te chu vawiin khan New Delhiah an inkawm. He hunah hain India leh Qatar chuan thawhdunna tur inremna thuthlung Memorandum of Understanding (MoU) pahnih an ziaak a. Heng MoU te hi ram pahnih thawhdunna strategic partnership tihhmasawn zelna tur leh chhiah lak thuaah tih bona tura hmalakna turte a ni.

Vawiina inbiaknaah hian External Affairs Minister Dr.S.Jaishankar, Union Finance Minister Nirmala Sitharaman, Union Commerce and Industry Minister Piyush Goyal, National Security Advisor Ajit Doval leh sawrka rmi pawimawh dangte an tel a ni.

Vawiin vek hian Sheikh Tamim hi Rashtrapati Bhawan ah ropui taka lawmna hun buatsaih a ni a. Sheikh Tamim hian ni hnih cham turin nimin khan India a lo thelng a. Airport ah Prime Minister Modian a lo hmuak a. Sheikh Tamim hi sawrkar mi pawiamwh tak takte leh sumdawng pawl hruaituten an rawn tawiawm a ni.

<><><>

PARIKSHA PE CHARCHA

Vawiin khan Pariksha Pe Charcha 2025 episode 8-na leh a hnuhnung berah UPSC,IIT-JEE, CBSE leh ICSE topper ten zirlaite hnenah fuihna thu an sawi. Exam topper te chuan zirlaite chu thil engkim an chhinchhiah vek thei lo tih sawiin chuvangin exam naa zawhna kal ngun bikte chhinchhiaha hre chiang turin an chah a. Kum hmasa exam paper te pawh uluk taka zir chiang turin an chah a ni.

<><><>

UKRAINE

Ukraine-a indona tihtawp tumin vawiin atang khan US leh Russia ram hruaitute Saudi Arabia khawpui Riyadh ah an indawr tan. He hunah hian Russian Foreign Minister Sergei Lavrov, leh Putin-a thachhang dawltu senior Yuri Ushakov te leh US aiawh US Secretary of State Marco Rubio, National Security Adviser Mike Waltz leh West Asia Envoy Steve Witkoff te chuan remna kawng siam tumin an indawr a.Hetihlai hian he inbiaknaah hian

Ukraine leh Europe ram hruaitute telh ve an ni lo a, Ukraine President Volodymyr Zelensky chuan an tel ve lohna thil chu engmah an pawm lo ang a ti a. President Zelensky hian vawiin khan Turkey a thleng a. Turkish President Recep Tayyip Erdogan nen an inbia a. Hemi hnu hian Saudi Arabia a pan leh dawn a ni.

<><><>